

## BERTSO BERRIAK

Miren Artetxe

# Urriko egun ilun bati jarriak



BERTSULARIEN LAGUNAK

### I

Goizeko seitan iratzarri nau  
atearen kolpe hotsak,  
ohartzerako barruan ziren  
uniformedun arrotzak.  
Galdezka hasi zaizkidanean  
dar-dar egin dit ahotsak,  
baina, beldurrak ezkutatzeko  
aholkatu dit bihotzak.  
Hotzikara bat sorrarazi dit  
eskuburdinen krak hotzak...  
“Bide luzea izango dun hau,  
eutsi ta estutu hortzak”.

### II

Amaren begien amorrua,  
uzkurtutako bularra,  
aitaren arnasaren estua,  
bere belauen dardarra...  
“Ez ezan hau gogorrago egin,  
utz gerorako negarra;  
ez itzan gehiago arduratu,  
atera ezan indarra!”.  
Aita ta ama, orain hauxe da  
damutzen zaidan bakarra,  
maite nautenek amesgaizto hau  
barrutik bizi beharra.

### III

Maiz pentsatu dut hauxe gertatu  
zitekeen egunean,  
uniformeak gure etxera  
sar zitezkeen unean,  
senti nezakeen izuan eta  
senti nintekeen umean.  
Pentsamendu hutsa zena egi  
bihurtu da azkenean.  
Ta polizien bultzada batez  
atea itxi denean,  
inoiz izango ez naizen ni bat  
gelditu da barrenean.

### IV

Animo oihuak entzun ditut  
kalera irten ahala,  
ta ikusi dut nire lagunak  
garrasika ditudala.  
“Animo neska, jendeak ondo  
hagola ikus dezala”.  
Urrundik flashak boteaz hasi  
da kamera digitala,  
eta taupadak eztarriraino  
igo zaizkit berehala,  
gertatzen ari denaz oraintxe  
ohartu banintz bezala.

### V

Bi nazionalek pauso azkarrez  
ta bultzaka naramate,  
beraz, banoa maite ditudan  
pertsongandik aparte.  
Zerbait esaten saiatu naiz ta  
burua jaitsi didate.  
Orain lagunen oihuak ditut  
nire izuen estalpe.  
Zenbat denbora pasako ote da,  
berriro ikusi arte?...  
Besoa jasotzea lortu dut  
ta autora sartu naute.

### VI

Irain ta kolpeak hasi dira  
sartu orduko autora.  
Behera egin dit animoak  
ta adrenalinak gora.  
Gerta daitezkeen mila irudi  
datozkit orain gogora...  
“Duintasunez gaintu ezan  
bost eguneko aproba,  
hire buruaz errukitzeko  
edukiko dun denbora!”.  
Gau hau sekula biziko dudan  
luzeena izango da.

### VII

Ai! Datorkidan kalbarioa  
ezabatzerik balego!  
Lehenik bost egun isolaturik,  
polizien petzero,  
ondoren Marlaskaren ehizaki,  
gero kartzelan numero,  
lau urte prebentibotan ez dut  
epaiketarik espero,  
ziegan zuekin gogoratzu  
lokartuko naiz gauero;  
eta gaitz erdi hau bizi duen  
azkena izanez gero.

DOINUA: “Albizturtikan Bidaniraino”.



Bidali zure sortak [bertsoak@argia.com](mailto:bertsoak@argia.com) helbidera. Aukeratuak orri honetan argitaratuko ditugu.